

ԻՍՊԱՆԻԱՅԻ ՔԱՂԱՔԱՑԻԱԿԱՆ ՊԱՏԵՐԱԶՄԸ ԵՒՀԱՅԵՐԸ (1936-1939)

ԱՐԾՈՒԻԻ ԲԱԽՉԻՆԵԱՆ (artsvi@yahoo.com)

Աշխարհի այլեւայլ երկրներում բռնկուած ապստամբութիւններին եւ պատերազմներին հայ կամաւորների մասնակցութեան պատմութիւնը նորութիւն չէ: Բազմաթիւ են դէպքերը, երբ հայ մարտիկը կամաւորագրուել է իր համար երկրորդ հայրենիք դարձած երկրի ազատագրական պայքարին: Աւելին, եղել են դէպքեր, երբ յանուն գաղափարի այդ հայը որպէս կամաւոր մեկնել է երրորդ մի երկիր՝ մասնակցելու 'չարիքի' ոչնչացմանը:

Այդպիսին էր Իսպանիայի քաղաքացիական պատերազմը (1936-39). այն ժամանակ տակաւին չկար իսպանահայ համայնք, սակայն այդ պատերազմին մասնակցել են նաև հայ ժողովրդի զաւակներ՝ աշխարհի տարբեր երկրներից: Ժամանելով անձանօթ այդ երկիրը՝ նրանք ուս ուսի մարտնչել են յանուն իսպանացի ժողովրդի յաղթանակի ընդդէմ ֆաշիզմի. ուշագրաւ մի իրողութիւն, որը ցարդ մնացել է գրեթէ անձանօթ:

Հայերը մաս են կազմել «միջազգային բրիգադներ» (Brigadas Internacionales, խորհրդային իրականութեան մէջ՝ ինտերնացիոնալ բրիգադներ) զօրամիաւորումների կազմին, որոնք իսպանիայի ազգային-Եղափոխական պատերազմի ժամանակ Հանրապետական Բանակի կազմում մարտնչել են ֆաշիստների եւ իտալա-գերմանական զաւթիչների դէմ՝:

ՍՓԻԻՌԱՀԱՅԵՐԻ ՄԱՍՆԱԿՑՈՒԹԻՒՆԸ

Իսպանիայի քաղաքացիական պատերազմին հայ կամաւորների մասնակցութեան մասին, որքան պարզել ենք, առաջինը յիշատակել է Հրաչիկ Սիմոնեանը¹:

Իսպանիայի քաղաքացիական պատերազմին մասնակցած հայ կամաւորների մասին վկայում է Հայկական սովետական հանրագիրարանը. «4-րդ, 10-րդ եւ 14-րդ ինքերնացիոնալ բրիգադների կազմում մարդնչել են նաև սփիտքահայեր, որոնք աչքի են ընկել Մադրիդի, Գուադալահա-

¹ 1937ին իսպանացի պաստամբներին ուազմական օժանդակութիւն են բերել տարբեր ցեղի աֆրիկացիներ՝ 78,000, գերմանացիներ՝ 29,000, իտալացիներ՝ 82,000, իրանդացիներ, լեհեր եւ այլ ազգեր՝ 12,000: 212,000 օտար զինուորներ են եղել իսպանիայում կառավարական ուժերի դէմ կոռուող («Օտար զինուորներ Սպանիոյ մէջ», Արաքս, 10 Ապրիլ 1937):

² Հրաչիկ Սիմոնեան, Սփիտքահայութիւնը սոցիալ-քաղաքական պայքարի ուղիներում, Երեւան, «Հայաստան», 1968, էջ 415-16. նաև՝ Զաւէն Մըսըրլեան, «Սփիտքահայ քաղաքական խմորումներ համաշխարհային Բ. պատերազմի նախօրեակին (1933-1939 թթ.)», Հայկագեան հայագիրական հանուէս, հղր. Է., Պէյրութ, 1979, էջ 91-92:

րայի (sic), Խարամայի, Էքրոյի մարդերում: Հերոսի մահով են ընկել Գրիգոր Հարոյեանը, Աշոտ Անդրէասեանը, Կայծակ Գարակօզեանը, Գառնիկ եւ Թորոս Լորասեանները, Յովհաննէս Բոգդալեանը³, Պողոս Պերճեցին, Յովհաննէս Թոփալեանը, ու քաջարար կոռուկ Վահէ-Ազար Ադամեանը, Ռուդոֆ Շահինեանը, Խաչիկ Ամիրիսանեանը, Յակոբ Մարտիրոսեանը եւ շաբ ուրիշներ: 1936ի Դեկտեմբերին «Միլիսիա ողիս» (Կարմիր միլիցիա) թերթը գրեց հանրապետական բանակի սպայ կապիտան Վահան Չքայեանի քաջազործութիւնների մասին: 1937-38ին Ֆրանսիայի հայ հասարակայնութիւնը հանգանակեց եւ Հանրապետական Խսպանիայի օգնութեան կոմիտէին յանձնեց 1 մլն. ֆրանկ»⁴: Յաւօք, նշուած անոնները (մէկ քացառութեամբ) մեզ չեն հանդիպել այլ աղբիւրներում...:

Խսպանիայի քաղաքացիական պատերազմի շրջանում հայ մամուլը բազմից անդրադարձել է այդ խնդրին՝ երբեմն տեղ տալով հայ յօդուածագիրների գրութիւնների⁵: Այս պատմական իրադարձութիւնը որոշակի ազդեցութիւն է ունեցել հայերի վրայ՝ Հայաստանում թէ Սփիտքում: Այսպէս, հալէպահայ ազգային գործիչ Ռոպէր Ճեպէճեանի վկայութեամբ. «Սպանական յեղափոխութիւնն ու պակերազմի անցուդարձերն ալ երիցասարդութեան մօց տեղի կու բային ցնցիչ անդրադարձումներու, հոգեկան զգոնութիւն՝ դեմոկրատիայի պաշտպանութեան անհրաժեշտութեան հանդէպ»⁶:

1937ի տուեալով՝ Խսպանիա գտնուող հայ կամատրների թիւը եղել է մոտ 100: Ըստ Լու Անջելըսի Նոր Ուլի թերթի՝ «Այս մարդիկը արկածախնդիրներ չեն, որոնք կը վարձուին զանազան բանակներու մէջ. ոչ մէկ կերպով: Անոնք կամատր են բառին ազնուագոյն իմաստովը. մարդիկ՝ որոնք կամատրաբար իրենց կեանքը ի սպաս կը դնեն ժողովուրդներու ազարագրութեան համար եւ արիւնարբու ֆաշիզմի դէմ մղուող պայքարներուն: Թող այս քաշերը օրինակ ծառայեն մեզ ամէնուա»⁷:

Ամերիկահայ համայնավարների Բանուոր թերթը 1937ի Ապրիլ 3ի թուամ հաղորդել է Միսաք Չելէպեան անոնով հայ կամատրի զրոյնելու լուրը Յունուարի սկզբին Խսպանիայում: «Ընկեր Չելէպեան Ամերիկայէն Սպանիա մեկնող կամատրական խումբին միացաւ 1936ի Դեկտեմբեր

³ Հաւանաբար Պոհճալեան:

⁴ «Ինտերնացիոնալ Բրիգադներ», Հայկական սովետական հանրագիտարան, հրո. 4, Երեան, 1978, էջ 355-56: Էջ 355ում կայ նաև ֆրանսահայ կամատրների լուաննկար:

⁵ Ասատուր, «Հերոս Ալբազարը», Հայրենիք, 2 Հոկտեմբեր 1936. նաեւ՝ Վարդգէս Ահարոննեան, «Ալբազարի եօթանասուն օրերը», Հայրենիք, 22-29 Հոկտեմբեր 1936. նաեւ՝ «Մատրիս», Հայրենիք, 27 Դեկտեմբեր 1936:

⁶ Ռոպէր Ճեպէճեան, Ինքնակենսագործիւն. յուշեր եւ գործունէութիւն, Հալէպ, Վկոլիշտ Ճեպէճեան Գրադարան, 1999, էջ 217-18:

⁷ Մէջբերում ըստ՝ «Սպանիոյ հայ կամատրները»ի, Արագ, 25 Յուլիս 1937:

ամսուն: Ան կը պատկանէր Արրահամ Լինքընի ջոկապին, որուն մէջ կը գդնուի նաև ուրիշ հայ բանուորներու խումբ մը: Ընկեր Չելէպեանը կը պատկանէր արագահարուածի խումբի մը եւ հմուտ էր այդ գործին մէջ: Ան սպանուցաւ ֆաշիստներու կողմէ արձակուած ոռումքէ մը»⁸:

1937ի Ապրիլի 23ին Բանուորին իսպանիայից նամակ է ուղարկել թերթի խմբագիր Վահրամ Գէորգեանը: Նա Ամերիկայից իսպանիա է մեկնել որպէս կամատոր եւ մասնակցել Գուադալխարայի եւ Կորդովայի ճակատամարտերին: Գէորգեանը վկայել է, որ հանդիպել է ֆրանսիական եւ բելգիական գումարտակի անդամ ֆրանսախօս մի հայի: Իսկ նրա բովդարացի ընկերը տեղեկացրել է, որ 25 հայեր կամատոր եկել են Բովդարիայից, յանուն ժողովրդավարութեան պաշտպանութեան՝ իսպանական ֆաշիզմի դէմ կոռուելու: Թուրքիայից եւս եկել են միջանի հայեր, որոնք միացել են միջազգային բրիգադին, չորս հայ էլ եղել է «Արրահամ Լինքըն» գումարտակում⁹: «Մեր ժողովրդական բանակի յաղթանակներն ու յաջողութիւնները կ'ոգեւորեն մեզ, նոյնպէս բոլոր անոնք, որոնք ֆաշիզմի դէմ կը կոռուին Սպանիային դուրս: Մեր ընկերները մարդունակութեան սքանչելի ապացոյցներ գրուին Կուադրալիարայի եւ Քորդովայի ճակարտներուն վրայ: Յնցող յաջողութիւնը, որ մեր յաղթական բանակը ունեցաւ, ապացոյց մըն էր, թէ կարգապահ եւ կերպոնացեալ հրամանակարութեան դրակ մարզուած բանակները ինչե՛ր կարող են ընել: Ասիկա պատրահական չէր, այլ պրույզ ամիսներու անընդհափ աշխալանքին անոնց, որոնք գիրքին թշնամիին դէմ կոռուիլ երկու ճակարի վրայ, զինուորական եւ բաղաքական»¹⁰:

Իսպանիայի հայ զինուորներից շատերը չեն կարողացել վերադառնալ իրենց բնակած երկրները: Շատերն անցել են Ֆրանսիա, որտեղ մնացել են համակենտրոնացման ճամբարներում: Այս մասին վկայել է իսպանական հայ վետերաններից Յակոբ Մարտիրոսեանը՝ ամերիկահայ կամատոր Յովիաննէս Ալդամեանին գրած նամակում, հրատարակուած 1939ին, ամերիկահայ Լրաբեր թերթում¹¹: Աւելորդ չենք համարում այն մէջբերել գրեթէ ամբողջութեամբ.

Նախ եւ առաջ ձեր որպիստութիւնը կը հարցնեմ: Եթէ զիս հարցնելու ըլլաք, ողջ եւ առողջ եմ: Ահա ասիկ, սիրելի ընկերս Յովիաննէս, Սպանիային Ֆրանսա անցած եմ: ԱՅՍ ՏԵՂ ՔԱՇԱԾՆԻՍ ՄԻ ՄԻԱՅՆ ՄԵՆՔ ԳԻՏԵՆՔ: Այստեղ, Ֆրանսայի հայկական ընկերութիւններէն մեզի ո՞չ հասնող կայ, ո՞չ ալ փնտողող: Սիրելի ընկերս Յովիաննէս, քեզմէ շատ կը խնդրեմ, որ ստորեւ

⁸ «Հայ Կամատորներ... Սպանիոյ Մէջ», Արագ, 14 Մայիս 1937:

⁹ «Ընկեր Վահրամ Գէորգեան Կը Գրէ Հերոսական Սպանիային», Նոր Ուղի, 11 Յունիս 1937, նաեւ՝ Արագ, 1 Յուլիս 1937, էջ 2:

¹⁰ Անդ: Վահրամ Գէորգեանը զիհուել է 1937ի Յովիսին (Սիմոնեան, էջ 416):

¹¹ «Սպանական Հայ Կամատորները Պէտք Ունին Մեր Օգնութեան», Լրաբեր, 18 Մայիս 1939:

գրուած անունները հայկական Լրաբեր թերթի մէջ տպել տաս: Քեզմէ կը սպասեմ, որ Ամերիկահայ հակաֆաշիստ Եղբայրներու կողմէ օգնութիւն մը դրկէք մեզի: Երբ Քաթալոնիան կորսնցուցինք, լեռներու վրայով հետիւտն Ֆրանսա անցանք: Եւ Ֆրանսացիները մեզի առին ու համակեդրոնացման կայանը տարին: Հիմա մեզի գերիի պէս կը նային: Շատ գէշ վիճակի մէջ ենք: Կարծեմ, թէ դուք արդէն իոն թերթերու մէջ կը կարդաք: Վերջացնելով երկտողս, ջերմագին ողջոյններս կ'ուղարկեմ հակաֆաշիստ բոլոր Ամերիկահայ Եղբայրներուս: Վստահ եմ, որ անոնք պիտի չզլանան իրենց լաւագոյնը ընել մեզի համար¹²:

Մարտիրոսեանը յիշել է նաեւ իսպանական պատերազմին մասնակցած հայերի անունները՝ Արամ Ակորեան, Արիստակէս Ակորեան, Սենրակ Ակորեան, Գէորգ Արամեան, Դանիէլ Գազանճեան, Դափիթ Դափիթեան, Եղուարդ Թաշճեան, Վահան Կոստանեան, Վահան Վահանեան, Գառնիկ Քելէրեան:

Թէեւ այստեղ յիշուած է 11 անուն (Մարտիրոսեանը ներառեայ), թերթում գրուած է. «Բացի այս 14 վերերաններէն, ուղիշ կայանին մէջ կը գդնուին չորս վերերաններ»¹³:

Լրաբերն ընդառածել է այս կոչին եւ բացել նուիրատուութեան մի սիւնակ, որտեղ արձանագրուած գումարները պէտք է ուղարկուեն «Աբրահամ Լինքըն» գումարտակի գրասենեակը՝ համակենտրոնացման կայանների հայ վետերանների համար: Յովիսին արդէն հաւաքուել է 39.80 դոլար¹⁴:

1938ին իսպանիայի ժողովրդին օժանդակելու կոչով հանդէս է եկել նաեւ Ուրուգուահայ ժողովրդային Միութիւնը: Նրա անդամ Պետրոս Պարտիզանեանը միութեան հաւաքներից մէկի ժամանակ կոչ է արել սատարել իսպանիայի հակաֆաշիստական պայքարին. «Բոլոր անդիֆաշիստներու գեղը պէտք է որ ըլլայ Ուրուգուահայ ժող. Միութիւնը: ...Ամսական 20-50 սէնթով (‘) եւ կամ իին եւ նոր հագուստներ նուիրելով, այդ կարող էք ընել դուք Սպանական օգնութեան կոմիտէի միջոցաւ: Այն, ընկերներ քաղաքացիներ, օգնե՞նք Սպանական արի ժողովուրդին, որ կարենան անոնք թաղել ֆաշիզմը Սպանիո մէջ: Ուրեմն ես ծեզ հետ միասին

¹² Անդ:

¹³ Անդ:

¹⁴ «Կը պատասխանեն Սպանիայի հայ կամատրներու դիմումին, ի նշան Երախտագիտութեան», Լրաբեր, 13 Յուլի 1939, էջ 2: Այստեղ նշուած է, որ տէր եւ տիկին Քեաթիպեանները թերթին գրել են. «Ի՞նչ անդարբերութեան ու զլացումի հանդիպած ըլլալու են Սպանիո (sic) մեր կամատրները, որ «Լրաբեր»ի Մայս 18ի թուի մէջ հրապարակած իրենց նամակով կ'ըսեն. արդեօք յանցանք մը գործեցինք Սպանիո (sic) համար կոռուպով: Սակայն Լրաբերի վերոնշեալ թում նման խօսքեր չկան:

վերցնելով իմ բաժակը՝ կը խմեմ եւ կը գոչեմ՝ կեցցէ անպարտելի Սպան-իան եւ անոր օգնող միջազգային ազարասէր ժողովուրդները»:¹⁵

1940ին Ամերիկահայ Երիտասարդական Միութեան (ԱԵՄ, Armenian Youth Association) կենտրոնական վարչութիւնը կոչ է յիել ամերիկահայութեանը՝ օգնելու հսպանիայի կամատրներին եւ գաղթականներին: Նշուել է, որ այդ կամատրների մէջ կան 20 հայ երիտասարդներ, որ աշխարհի տարբեր երկրներից մեկնել են հսպանիա՝ կոռուելու ֆաշիզմի դէմ: Նրանց մէջ երել են նաեւ տասնեակի չափ ԱԵՄի անդամներ՝ Աշոտը, Զորջը, Հերութը... Նիւ Եորքում հայկական յանձնախումբ է կազմուել՝ տեղի հայութեան մէջ հայ կամատրների օգնութեան գործը կազմակերպելու համար¹⁶: Նոյն թուականի Ապրիլին Նիւ Եորքում կայացել է հսպանիային նուիրուած խորհրդաժողով, որտեղ որպէս ԱԵՄի պատուիրակ մասնակցել է Գրէս Շահինեանը: Նա վկայել է, որ ԱԵՄը լաւագոյն մարտիկներն է ունեցել հսպանիայի ճակատներում¹⁷:

Իսպանիայում մարտնչած կանադահայ Դավլը Պատրիկ Սթիլնզը իր *A Memoir of the Spanish Civil War: An Armenian-Canadian in the Lincoln Battalion. Canadian Committee on Labour History* հատորում,¹⁸ տեղեկութիւններ է հաղորդել նաեւ հսպանիայում մարտնչած հայ կամատրների վերաբերեալ: Սթիլնզը (Պատրիկ Տէր-Ստեփանեան, 1910–87) ծնուել է Հայաստանում, 1926ին ընտանիքով արտագաղթել է Կանադա: Իսպանիա է ժամանել 1937 Փետրուարին՝ համարելով մօս 500 կանադացի կամատրների շարքերը: Նա որպէս հրետանատոր, մատակարարման դեկավար եւ ուազմական քննիչ ծառայել է 15րդ բրիգադի «Աբրահամ Լինքլըն» գումարտակում (այն ամերիկեան էր, սակայն ընդգրկուած են եղել նաեւ կանադացիներ): Սթիլնզը մի անգամ յայտնաբերել է, որ զինամթերքի պահեստի պատասխանատուն ամերիկահայ է Նիւ Եորքից՝ Բիլ Սահակեան անուամբ: Վերջինս խնդրել է իր հետ մսալ զինապահեստում եւ կազմակերպել է նրա տեղափոխումը¹⁹: Սթիլնզը յիշել է նաեւ գնդացրորդների խմբի դեկավար Դաւթեանին²⁰ եւ մէկ այլ հայի Մեսեչուսէց նահանգի Ուտրսթըր քաղաքից, որը գոջալիս է եղել հսպանիա գալու համար, թէեւ Սթիլնզը մշտապէս փորձել է ուրախացնել ու գօտեանդել նրան: «Ես նրան ասացի, որ հենց հասնենք Ալարէս, ես գառ կը գնեմ ու մեր միջանի բրդաների հա-

¹⁵ Հայաստանի Ազգային Արխիւ, Փոնդ 314, ցուցակ 1, գործ 19, թերթ 10:

¹⁶ «Կոչ սպանական կամատրներու եւ գաղթականներու օգնութեան համար», *Լրաբեր*, 4 Մայիս 1940:

¹⁷ Գրէս Շահինեան, «Քոնֆերանս Սպանիո (sic) օգնելու», *Լրաբեր*, 7 Մայիս 1940:

¹⁸ Douglas Patrick Stephens, *A Memoir of the Spanish Civil War: An Armenian-Canadian in the Lincoln Battalion. Canadian Committee on Labour History*, 2000:

¹⁹ Անդ, էջ 38:

²⁰ Անդ, էջ 42:

մար հաճելի կերակուր կը պարրասպեմ»²¹: Մէկ այլ արտասովոր հանդիպում է նրան սպասել ոտքով Ալմոգեռա գնալու ճանապարհին, երբ կանգնեցրել է մի մողոցիկավարի եւ խնդրել իրեն հասցնել մօտակայ գիտը: վարորդն ասել է, որ ինքը Մարտէից է եւ իմանալով Սթիլնզի հայ լինելը՝ իշել է մողոցիկետից, սեղմել նրա ծեռքը եւ ասել, որ ինքը նոյնպէս հայ է՝ ֆրանսիական 14րդ գումարտակից եւ մեկնում է Գուադալախարա՝ միանալու իր գինակիցներին: «Մօղենալով Ալմոգեռային՝ մենք կանգ առանք մի սրճարանում ու մի-մի բաժակ իմեցինք՝ նշելու մեր ծանօթութիւնը: Յուսով եմ, որ նա ողջ մնաց պարերազմում ու ողջ-առողջ վերադարձաւ իր հարազարդների մօյր»²²: Սթիլնզը նաեւ յիշել է, որ մի անգամ էլ բովարացի բժիշկ սպայ Մինկովը մօտեցել է իրեն, սեղմել ծեռքը եւ ասել, որ գիտի, որ ինքը հայ է, որ բժշկութիւն ուսանելիս շատ լաւ հայ ընկերներ է ունեցել եւ որ եթէ Սթիլնզը որեւէ խնդիր ունենայ՝ ինքը կը փորձի ամէն կերպ օգտակար լինել իրեն²³:

Իսպանիայում մարտնչած մէկ այլ հայորդու՝ Հայկազ Խաչատուրեանի մասին վկայել է Թորոս Թորանեանը, որին հանդիպել է Բէյրութում: Նա յիշել է նաեւ այլ հայ կամաւորների.

Ինք, ջլապինդ Երիտասարդ, թուրքերու կողմէ որբացուած տղայ, կ'ուզէ սեւ այդ ֆաշիզմէն վրէժ լուծել: Երբ ներկայանայ առիթը, ոչ թէ մէկ առիթ, այլ բազմաթիւ: Սնսովկէն կը հանէ փաստաթուղթերը ու կը նայի Երկար, Երկար...

Մաքրուին կր կարծէ, որ Հայկազը թուրքին կր նայի, մինչ մեր Հայկազը հեռուներն է... Սպանիոյ մէջ է, Պարչելոնի մէջ է, գէնքեր կը կոր, գաղտնի գէնքեր կը մտցնէ Սպանիա, օգնելու համար այն հերոսներուն, որոնք Ֆրանքոյի դէմ կենաց մահու կոիս կը մղէին...

Ինչ օրեր էին Հայկազ: Հայը որպիսի հեռաւորութիւններ, ովկիանոսներ կտրելով եկած միացած էր բարթիզաններու բանակներուն, որոնք մէկ անոն ունէին – Հակաֆաշիստ:

Աշոտ Անդրեասեանը Ամերիկայէն եկած էր: Կային տղաք, որոնք Ալեքսանտրէթէն եկած էին, Պէյրութէն ու Ֆրանսայէն եկած էին:

Ու Հայկազը եկած էր Յունաստանի որբանոցներէն ու տասնեակ, տասնեակ անգամներ հարիւրատը գէնք ու գինամթերք մտցուցած Սպանիա:

Հայկազը Ֆրանքոյի դէմ կոռուած էր...

Մեր Հայկազը²⁴:

²¹ Անդ, էջ 57:

²² Անդ, էջ 69:

²³ Անդ, էջ 73:

²⁴ Թորոս Թորանեան, Երկիրներ եւ մարդեր: Վէա բազմահարիւր հերոսներով, Հալէպ, ա. հ., 2004, էջ 384: Հայկազ Խաչատուեանը ծնուել էր 1916ին եւ մահացաւ 10 Ապրիլ 1990ին: Նա մինչեւ 18 տարիքը եղել է Պէյրութի ՀՔԸՄԻ քելեկեան որբանոցում:

Նշենք, որ Իսպանիայի քաղաքացիական պատերազմին մասնակցելու են մեկնել նաեւ սփիտքահայերի աջ խմբատրումներից: Յունաստանում նախկին դաշնակցական խմբապետ Թորգոնը (Արսէն Թորգոն, գօրավարի ինքնակոչ տիտղոսով), որը Յունաստանում կազմել է կամատրական խումբ եւ մեկնելով Իսպանիա՝ գործակցել է Իսպանիայի ղեկավար գօրավար Ֆրանկոյի ուժերին՝ ընդդեմ հանրապետութեան²⁵: «Ժիրահոչակ ժէնէրալ (!) Թորգոն, ան, որ իր 25 դաշնակ «ջան-ֆերաներով» Հայաստանի անկախութիւնը հոչակեց... Կարինը ունենալով իբր մայրաքաղաք²⁶, եւ վերջերս դարձեալ հայ աշխարհաւոր ժողովուրդի ճակարագրին հետ իաղալու ոճրապարտ փորձեր կը կարարէ՛ ժէնէրալ Ֆրանկոյի օգնութեան փութալով Իսպանիա մի քանի հայ ֆաշիստ ավանդիւթիւներով...»²⁷:

Պատերազմից յետոյ Իսպանիայի իրավիճակի քաղաքական գնահատականը սփիտքահայ մամուլում ծաւալուն յօդուածով փորձել է տալ վերապատուելի Արսէն Ա. Կէօրկիզեանը²⁸:

ԽՈՐՀՐԴԱՀԱՅԵՐԻ ՄԱՍՆԱԿՑՈՒԹԻՒՆԸ

Յայտնի է, որ խորհրդային ռազմական մասնագիտներ նոյնպէս մասնակցել են Իսպանիայի քաղաքացիական պատերազմին: 1936-38՝ պատերազմին մասնակցել է նաեւ գիմրեցի Թադէոս Մանդալեանը (1901-41), որը 1939ին նշանակուել է Իսպանիայում ԽՍՀՄ գործերի հաստարմատար (մինչ այդ նա Հայաստանում մասնակցել է մայիսեան ապստամբութեանը, իսկ 1926-27՝ Չինաստանում կռուել է Չանհայի ապստամբների շարքերում): 1937-39՝ Իսպանիայում քարոզչական, հետախուզական, վնասագործական եւ պարտիզանական աշխուժ գործունեութիւն է ծավալել խորհրդային հետախոյզ Հայկ Թումանեանը (1901-71): Իսպանիայում կռուած խորհրդահայերի մասին մի ակնարկ գտնում ենք թատերագիր Ագնեսա Սեւունցի Նոյեմ թատեխսարդում, որի հերոսն ասում է. «Ահա իմ եղայր Անդրանիկը... դեռևս մինչեւ պարերազմը նա կայացած մարդ էր... Իսպանիայում է մարդնչել»²⁹:

²⁵ Սիմոնեան:

²⁶ Նկատի ոնի Հայաստանի անկախութեան հոչակումը 1918 Փետրուարի 13ին, Կարինում (Էրգորում): Հայ պետականութեան վերականգնման մասին գրաւոր հոչակագիրն ազդարարել է Էրգորումի կայազօրի պարէտ գնդապետ Արսէն Թորգոնը (Արմէնուի Ղամբարեան, «Հայաստանի անկախութեան Էրգորումի հոչակագիր», *Պարմարանասիրական հանդէս*, 2018:3, էջ 258-63):

²⁷ Երուանդ Թոլայեան, Կավոշ-Նամէ, աշխ.՝ Հենրիկ եւ Արծուի Բախչինեաններ, Ստանպով, Արաս, 2019, էջ 506:

²⁸ Վեր. Ա. Ա. Կէօրկիզեան, «Ֆրանքոյի Սպանիան եւ աշխարհի խաղաղութիւնը», *Լրաբեր*, 18, 21, 28 Յունուար 1947:

²⁹ Αγνεσσα Σεβυνց, Κορδα Σλυτιτ Χρονος (Երբ կատակում է Քրոնոսը), Երեւան, Կոլաժ, 2020, էջ 136:

Իսպանիայի քաղաքացիական պատերազմին իւրովի են արձագանգել խորհրդահայ շարքային քաղաքացիները, սակայն որպէս պետական քաղաքականութեան պարտադրուած գործողութիւններ: Հազար եւ մէկ կարիքի մէջ գտնուուղ Հայաստանում 1935-36ին օգնութիւններ են հաւաքել Իսպանիայի տուժած համայնավարների, նրանց կանանց եւ երեխաների համար: Այսպէս, 1935ի Յունուարին Երեանի սպանդանոցի աշխատաւորներն իրենց կէս օրավարձը (508 ոռփի 77 կոպէկ) յատկացրել են Իսպանիայի մարտնչող պրոլետարիատին: Հայաստանի կենտգործկոմի միջազգային յեղափոխական օգնութեան մարմնի բջիջը եւս 195 ոռփի 30 կոպէկ է յատկացրել Իսպանիայի պրոլետարներին³⁰: Նոյն ամսին Քանաքերի գործարանի Գ. մասի պաշտօնէութիւնն իր օրականի կէսը՝ 3000 ոռփի, յատկացրել է Իսպանիայի մարտնչող համայնավարներին³¹: Լենինականի շոգեկառքի մթերանցում կայացած հանրահայքի ժամանակ հաւաքել են 2100 ոռփի, Աշտարակի կանայք՝ 2547 ոռփի, Ուկեվազի գեղջկուինները՝ 300, Երեանի հեռագրատան կին աշխատողները՝ 160 ոռփի³²: 1936ին Բերիայի անուան կոմունիստական գիւղդպրոցի ուսանողները, դասախոսները եւ ծառայողները Իսպանիայի կամատրներին տրամադրել են իրենց մէկ օրուայ թոշակն ու աշխատավարձը (աւելի քան 600 ոռփի), հրշէջները՝ 935, Երեանի թուրքական մանկավարժական տեխնիկումը՝ 305, Սպենդիարեանի անուան երաժշտական թատրոնը՝ 161 ոռփի, պետական հանրային գրադարանը՝ 584 ոռփի 80 կոպէկ, «Արարկիր» արտադրամասի ծառայողները՝ մէկ օրուայ աշխատավարձը, Սեւանի ծովագրեստի աշխատողները՝ 795 ոռփի, կոյրերի միատրումը՝ 860, պետական թատրոնը՝ 1500, Հոկտեմբերեանի բամբակազտիչ գործարանի բանուորուինները՝ 400, Երեանի ուսուցիչների ինստիտուտի կին աշխատողները՝ 350, կարի արտադրամասի բանուորուինները՝ 900, Արարատ տրեստի բանուորուինները՝ 700 ոռփի եւն., եւն.: Ինչպէս յայտնել է Խոր-

³⁰ «Իսպանիայի պրոլետարիատի համար», Խորհրդային Հայաստան, 10 Յունուար 1935:

³¹ «Օգնութիւն Իսպանիայի մարտնչողներուն», Յուսաբեր, 26 Յունուար 1935:

³² «Օգնութիւն Իսպանիայի», Արագ, 5 Նոյեմբեր 1936, էջ 2: Իդէպ, նման մարդասիրական ցոյցերը նորութիւն չէին խորհրդային Միութեան եւ նրա մաս կազմող Հայաստանին համար: Այսպէս, 1925ին, մէկդի թողած սեփական կարիքաւորներին՝ Հայաստանի կենտրոնական գործադիր յանձնախմբի եւ գործավարների խորհրդին առընթեր բժիջը նիւթական օժանդակութիւն է հաւաքել գերմանացի բանուորների համար, ապա նաեւ՝ 72 ոռփի 88 կոպէկ հանգանակութիւն ուղարկել Էստոնիայի համայնավարների դէմ ձեռնարկած հալածանքների ժամանակ տուժած բանուորների ընտանիքներին (Խորհրդային Հայաստան, 26 Փետրուար 1925): Նման նախաձեռնութիւններով ողջ խորհրդային Միութեան աշխատաւորութիւնը իբր իր լուման էր ներդնում միջազգային համայնավարական շարժման:

հրդային Հայասպան օրաթերթը, Երեւանի թի 26 մանկապարտէզից Էլիկ Բէգլարեանը դաստիարակչուինս է տուել իր ունեցած երեք ոուրլին՝ ասելով. «Ուղարկէք Իսպանիայի կռուողներին»: Միևն երեխաներն էլ արձագանգել են Էլիկին եւ ընդիհանուր հաւաքել են 100 ոուրլի... Հարց է, թէ երբեւ իրենց նպատակակիտին հասել են արդեօք խեղճ հայ գործատրութիւնները եւ գիւղացիների զոհորութիւնների գնով տրուած օժանդակութիւնները³³:

Այս շրջանում խորհրդահայ մամովը յաճախակի նիւթեր է հրատարակել Իսպանիայի, նրա մշակոյթի վերաբերեալ³⁴: 1936ին Երեւանի երաժշտանոցի դահլիճում տեղի է ունեցել իսպանական երաժշտութեանը նուիրուած երեկոյ՝ ի համակրանք մարտնչող իսպանացի ժողովրդի³⁵: Հայաստանի հանրապետական ժողովրդական ստեղծագործութեան եւ ինքնազործ արուեստի տունը 1937ին ոռաերէնից թարգմանել է իսպանական յեղափոխութեանը վերաբերող Նրանք չեն անցնի թատերախաղը շրջանային ինքնազործ թատրոնների համար³⁶:

Խորհրդահայերը որոշ առնչութիւններ են ունեցել 1930-40ականներին ԽՍՀՄ ապաստանած իսպանացի համայնավարների հետ: Նրանց մի մասը հանգրուանել է Կովկասում: Հազարաւոր իսպանացի փախստականներ յայտնուել են Խորհրդային Միութիւնում, այդ թուո՞յ յեղափոխական առաջնորդներ Դոլորէս Իբարրութին եւ Խոսէ Դիասը, որը 1942ին Թբիլիսիում սպանուել է Խորհրդաւոր պայմաններում³⁷:

³³ Խորհրդային Հայասպան, 12 Հոկտեմբեր 1936: Այս առթիւ դաշնակցական մի թերթ գրել է. «Հայասպան ուր, Սպանիա ուր՝: Ամենքը իրար անցած են Խորհրդային Հայասպանի մէջ, մեծ ու պարիկ: Չըլլայ՝ որ եւր մնան, չըլլայ՝ որ իրենց հաւաքարմութիւնը կասկածի դակ դրուի, չըլլայ՝, որ բարեխնամ եւ բարեգութ մեծ Սրայինը վշտանայ» (Ասատուր, «Օգնում ենք Իսպանիայի», Հայրենիք, 17 Նոյեմբեր 1936): Ժուելով վերոյիշեալ հանգանակութիւնները՝ նոյն յօդուածագիրը շարունակել է. «Կը դեսնէ՞ք եռանդը, հայկական որեւէ ձեռնարկի, որեւէ նապատակի համար այսպիսի հավաճեպով, եռանդով դրամահաւաքութեան մասին երբեկցէ լսե՞ր էք Խորհրդային Հայասպան կոչուած երանելի երկրին մէջ: Օգնում ենք Իսպանիայի: ...Ժողով իրճուի Մագրիբի փախստական կառավարութիւնը, Խորհրդային Հայասպանի փոռնքիշորները կոչուած են փրկելու գինը, եթէ Իսպանիայի ժողովուուր ինքը չուզեր ընել այդ բանը» (անդ):

³⁴ Տե՛ս, օրինակ՝ Մ. Դ., «Կատալոնիայի հերոսները», Խորհրդային արուեստ, 1 Նոյեմբեր 1936. նաեւ՝ Լ. Նիկոլին, «Էլ Պրադո թանգարանը», Խորհրդային արուեստ, 16 Նոյեմբեր 1936. նաեւ՝ ֆ. Կելին, «Իսպանական թատրոն», նոյն:

³⁵ «Իսպանական երաժշտութեանը նուիրուած երեկոյ», Խորհրդային Արուեստ, 1 Յունուար 1937:

³⁶ «Արուեստի լրատու», Խորհրդային Հայասպան, 1 Սեպտեմբեր 1937:

³⁷ А. А. Сагомонян, «Попытки Развертывания Партизанского Движения в Испании (1944-1948 гг.)» (իսպանիայում պարտիզանական շարժման ծառալման փորձերը, 1944-1948 թթ), Վոլոյուի Իսպորիի (Պատմութեան հարցեր), 1998:6, էջ 138:

Իսպանացի համայնավարները եւ քաղաքացիական պատերազմի հերոսները, յատկապէս Դոլորէս Իբարրուրի-Պասիոնարիան (1895–1989), ոգեւորութեան աղքիր են եղել խորհրդային ժողովուրդների, նաեւ հայերի համար: Արձակագրուիի Էլտա Գրինի (1928–2016) «Այդ զարմանալի խակի գոյնը» պատմուածքի հերոս Մառլէն Եղիշեվիչը, յիշում է, որ իր կեանքում բազմաթիւ շրջաններ են եղել, որոնցից մէկն էլ եղել է Իսպանիան:

Թիֆլիսի օդաչուական ուսումնարանում իմ սովորելու ժամանակ Մադրիդը ոմբակոծում էր,- ասաց նա:- Դադիօհալորդավարուիին ասում էր իծվիս Մադրիդի, իծվիս Մադրիդի կուչերի, որ վրացերէն նշանակում է՝ Մադրիդը վառտում է, վառում են Մադրիդի փողոցները... Նա յայտնեց, որ Թբիլիսիի օդանաւակայանում տեսել է Դոլորէս Իբարրուրիին եւ ինքնագիր է խնդրել յիշատակի համար: Եւ Դոլորէսը շտապելով՝ թղթի պատառիկի վրայ հենց ինքնարին բարձրանալիս գրել է մի հատիկ բառ՝ Կորդիալմենտէ, որ նշանակում է՝ ի սրտէ:

- Բոցաշո՞ւնչ Դոլորէս Իբարրուրիին: Պասիոնա՞րիան,- բացականչեց նա: ...- Ամոր ա պրիմերա վի՞ստա: Սէ՛ր առաջին հայեացքից,- գոչեց Մառլէն Եղիշեվիչը³⁸:

1930ականների խորհրդային Հայաստանի գիտի կեանքը պատկերող Աննոլդ Ալաբաբովի Որդեղ Էիր, մարդ ասպծոյ շարժանկարում (1992) յիշում է, թէ ինչպէս են ամուսինները ցանկանում իրենց նորածնին անուանել խոսէ Դիաս՝ ի պատիւ վերոնշեալ խապանացի յեղափոխականի, իսկ գիղացիների խօսքությունում յիշում է Իսպանիայի քաղաքացիական պատերազմը (հիդէպ, նշուած իրողութինները բացակայում են շարժանկարի գրական հիմքում՝ Զօրայր Խալափիեանի համանուն վիպում):

1936ին խորհրդահայ մամուզում Իբարրուրիին նովիրուած բանաստեղծութեամբ (գրական արժէքից գուրկ) հանդէս է եկել Գուգարունի ծածկանուամբ մի հեղինակ³⁹: 1937ին բանաստեղծ Գեղամ Սարեանը (1902–76) հրատարակել է Իսպանիայի պատրանի հերոսները գրքոյլը: Այնտեղ «Ալվարօ» բանաստեղծութեան մէջ՝ նովիրուած ժողովրդական հերոսին, մասնաւորապէս ասում է.

³⁸ Էլտա Գրին, Երազների պիեզերք, Երեւան, Մաշտոց, 2004, էջ 190:

³⁹ Գուգարունի, «Դոլորէս Իբարրուրուն», Կարմիր սպորտ, 31 Դեկտեմբեր 1936:

<p>Թախօ գեղի ափով կանաչ՝ Մի քաջ դողայ զինուած, Քայլում է լուս դէպի առաջ, Հերախուզման եղած: Թփուպների մէջ աննկայր, Ճամփով արեայի, Ալվարօն է երիւրասարդ Թողեղոյից գալի:</p>	<p>– Իսպանիա, թեզ ազարութիւն Մենք կը բերենք արեամբ, Քեզ վառողի ծովսն է պարում Հիմա ինչպէս սեւ ամայ. Ազարութեան արեւով վառ Կը ցրենք ամայ ու մէզ, Ու կը յինենք կուտամ յամառ, Չենք նահանջի երբեք:</p>
---	--

Արձակագրուիի Լիսի Թարգիվը (1905-55) 1939ին իրատարակել է Դէպի Իսպանիա վէպը, որը կոչ է արել կամաւրական ջոկատներով օգնութեան հասնել իսպանացի ապստամբներին: Իսկ հայազգի խորհրդային վաւերագրող Արշա Օւանեսովան (Յովիաննիսեան, 1906-90) 1936ին նկարահանել է Ռոջոյն Իսպանիայի պիոնէրներին շարժանկարը:

Ամփոփելով ներկայացուած փաստական նիւթը՝ կարող ենք հաստատել Իսպանիայի 1936-39ի քաղաքացիական պատերազմում հայ ժողովրդի զաւակների մասնակցութիւնը (առնուազն՝ հարիւր հոգի): Յատկանշական է, որ եթէ ի համակրութիւն իսպանացի համայնավարների ԽՍՀՄի կողմից ի պաշտօնէ ուղարկուել են հայազգի մասնագէտներ, ապա տարբեր երկրներում ապաստանած հայեր (Ֆրանսիա, ԱՄՆ, Կանադա, Բուլղարիա, Լիբանան, Յունաստան, Թուրքիա) այդ պատերազմին մասնակցել են միանգամայն կամաւր սկզբունքով: Հայերը մարտնչել են թէ՛ հանրապետականների շարքերում, թէ՛ հանրապետականների դէմ: Օսմանեան քաղաքականութեան այլատեացութեան եւ ցեղասպան քաղաքականութեան պատճառով հայրենազուրկ դարձած այդ հայերը պարզապէս չեն կարողացել հանդուրժել աշխարհի մէկ այլ մասում բռնկուած ֆաշիստականութիւնը եւ յաճախ իրենց կեանքի գնով նպաստել են ֆաշիզմի դէմ յաղթանակին:

Ինչ վերաբերում է խորհրդահայերին, ապա նրանց պարտադրուել է իրենց համակրանքն արտայայտել իսպանացի ժողովրդին դրամական նուիրատութիւնների եւ իսպանիայի վերաբերեալ տեղեկացուածութեան բարձրացման միջոցով, որի արդիւնքում իսպանական քաղաքացիական պատերազմն ու նրա հերոսները գրական նիւթ են դարձել միքանի հայ գրողների համար:

THE SPANISH CIVIL WAR AND THE ARMENIANS (1936-1939)

(Summary)

ARTSVI BAKHCHINYAN (artsvi@yahoo.com)

The participation of Armenians in the Spanish Civil War is almost unknown. At least one hundred Armenians from different countries (France, USA, Canada, Bulgaria, Turkey, Lebanon) participated in that war, on a completely voluntary basis, as members of special military units known as International brigades. These Armenians, who became stateless due to the xenophobia and genocidal policies of the Ottoman Empire, simply could not tolerate the outbreak of fascism in another part of the world and joined in the struggle against fascism, sometimes at the cost of their lives. Captain Vahan Chkayan, an officer in the Republican army, is an outstanding figure among these volunteers.

Several Soviet Armenian specialists were officially sent by the USSR to support the Spanish communists. During the war years, Soviet Armenian citizens, like all the peoples of the Soviet Union, were forced to express their sympathy for the Spanish people through donations and raising awareness of the events in Spain. They organized various cultural events and gatherings. The Spanish Civil War and its heroes became a source of inspiration for some Armenian writers.